

明綱目前紀

記明太祖稱大元帥時事始元至正十五年

至二十八年定鼎凡二卷

鮑廷博知不足齋藏印二方凡

鮑氏自鈔之書皆此烏絲欄寫定校過



前紀之例取法前編年則至正之年事皆明祖之
事元朝及羣雄與明祖相涉始書於冊以其事已
詳於宋元綱目也



前紀之綱畧用書法而目全記開國規模補宋元
綱目之畧故序事獨詳稱大元帥吳國公吳王稱
皇帝皆如其所稱而異例取史漢高帝紀

乾隆七年十一月朔總裁進 呈奉

硃批朕材謝知古學未通經當此史筆之公實恐目
光之眩至明祖前紀體例諸卿所見與朕意同蓋
大君臣子名分不可逃於天地間僭號興王予奪

嚴乎辭語敢曰繼春秋而翼道于以昭來茲之鑒
觀我君臣其共勉之欽此 十二月廿二日再進
呈奉

旨甚是欽此

綱目館總裁官大學士伯臣鄂爾泰臣張廷玉
尚書臣陳惠華等議得綱目一書垂憲萬世文
雖歸於簡要而一代之事實必詳體雖限於編
年而千古之名義必正今奉



勅纂脩明代綱目上接宋元其條例一稟朱子綱舉
目張眉陳指列無可疑者惟是事異前代不可
但拘舊文若非斟酌變通必致紀載失寔如侍
郎周學健奏稱明祖之興與宋祖迥異宋祖戡
亂致治皆在即位之後明祖起兵濠梁定鼎江
東平陳友諒平張士誠平方國珍暨頒定官制

設科取士詳考律令諸政皆在未即位以前而
續綱目所修元順帝紀於明興諸事不覈不白
今明紀綱目既始自洪武元年若於分注之下
補敘前事不特累幅難盡且目之所載與綱不
符於編年之體未協若竟畧而不敘則故明開
國創垂之由缺然不彰於後世大非史氏詳備
之旨而自洪武元年以後一切政治之沿革事
蹟之源流臣工之黜陟宜立綱陳目者皆突出
無根亦大非春秋先事以起例等語臣等再三
籌酌此係開卷首條最宜詳審若概畧從前既

於本末不貫若補敘煩冗又與體裁不符誠如
周學健所奏臣等所亟當議定以便編纂成書
者也但周學健奏中尚有未協之處謹就臣等
管見所及為我

皇上陳之按明太祖即位在戊申歲正月乙亥實元
順帝至正二十八年也是時順帝尚在大都至
閏七月丙寅徐達師抵通州順帝始奔沙漠則
閏七月以前仍宜大書至正二十八年而明太
祖之大書洪武元年則斷自是年八月始此一
定不易之義也應將周學健奏稱以明太祖洪

武元年繼元至正二十七年之處毋庸議又按宋元續綱目成於成化十二年其順帝紀本為元作事關天下不得專言一國故於明祖開創次第不過畧書一二十大端其稱明祖為我太祖猶春秋稱魯侯為公朱子綱目稱宋祖為我太祖也史臣之辭自合尊崇當代何嫌何疑且前人成書後人何容輕改我

聖

祖仁皇帝御批頒布宇內於續綱目原文一字不易慎之至也應將周學健奏稱再修宋元綱目改稱我太祖為明祖之處毋庸議又按三代以下

得國正大首推漢高次即明祖周學健謂明祖同符漢高語誠有當但其事有似同而寔異者漢高先入關而後滅楚明祖先除張陳二盜而後北定元都也其稱吳國公吳王亦約畧可為沛公漢王之比但義帝立僅一年後即楚漢爭雄綱目自應並注明祖至至正二十七年韓林兒卒始自稱吳元年前此皆用林兒龍鳳年號何得分注於至正年號之下應將周學健奏稱順帝紀內改書吳國公吳王列於至正編年之下之處毋庸議臣等再三籌酌綱目之體原倣

春秋左傳左傳有先經發傳之例故於隱公首
簡先叙惠公又元儒金履祥因周威烈王二十
二年以前事綱目未載補作前編有此二例可
引請

皇上勅下史局將元至正十五年明祖起兵以後迄
二十八年順帝未奔沙漠以前另為前紀仍以
至正編年至二十八年閏七月止列於今所修
綱目正文之前其稱名稱吳國公稱吳王倣朱
子書漢高之例則一代開創之事寔既詳千古
之名義亦正既不輕改成書且可變通舊例似

於傳世立教之意更為慎重 臣等管見是否可
採伏乞

睿覽施行謹議本日奉

旨甚是依議行

謹

奏為陸續恭進明史綱目稿本事前臣等欽奉

諭旨所修明史綱目著陸續進呈隨據副總裁官刑部侍郎周學健招奏前明太祖武功文治多在元至正年間前史不核不白請將元紀續綱目一書酌量增入事蹟並改定書法條例等語經臣等議以成書未便議改前編有例可循奉

旨允行在案謹纂輯前紀自元至正十五年起迄二十八年閏七月止凡二卷恭呈

睿覽竊惟帝王之興規模定於始事春秋之義號令

稟於一人臣等愚見以前紀之作雖為明祖追敘以著王業所由寔亦與續綱目並行以補元紀之缺事可參觀義須互見茲於分書事蹟一詳覈文用追叙體總稱明祖若其始為大元帥及自立為吳國公大書皆從僭號之例以其時元季玉步未改天王正朔有歸明雖興王何逃名分蓋既別為一書則體例無嫌小變而不恕其僭號則褒辭彌見大公惟是臣等囿於學識恐未能折衷至當是否於新書正文舊史佚事不無小補伏候

聖明裁定再自洪武元年以後綱目正文事關勝國遺蹤

盛朝竅鑒凡主德之隆替國是之善敗物力之衰旺民風士習之淳澆紀載並務詳明褒貶尤宜矜重查現在館各分修官稿本次第就緒容臣等遞加點勘陸續進呈茲先具洪武元年八月迄十年止擬定綱目凡三卷並呈

睿覽嗣後每次進呈擬以十年或二十年為率緣臣等雖裁取衆長虛心彙括而體追筆削自信良難惟我

皇上遠紹經心夙精史鑑增損予奪隨宜

訓示俾得以次酌改統歸諦當用成完書垂示無極
臣等幸甚又史氏之疎不惟挂漏或冗或複所
在有之故有一事當分見數條者有數事當并
入一條者有後事當預為立案者有前事當從
後追敘者是必統觀全書乃可施以別擇容臣
等於陸續進呈稿本之外倘有所見另摺

奏聞請

旨理合聲明為此謹
奏

乾隆七年十一月初一日奉

硃批

朕材謝知古學未通經當此史筆之公寔恐目光之
眩至明祖前紀體例諸卿所見與朕意同蓋大君臣
子名分不可逃於天地間僭號興王予奪當嚴乎辭
語內敢曰繼春秋之翼道於以昭來茲之鑒觀我君
臣其共勉之欽此

網目館總裁官貼籤

謹

奏為遵

旨改定書法並陳臆見仰懇

睿裁事前臣等恭進網目前紀及洪武元年至十年

網目正文欵奉

硃批訓勉周至本日復面奉

諭旨應酌改數處一經

指示曠若發矇仰見我

皇上聖性誠明睿學淹貫寔非臣等淺臆所及伏查



宋元綱目元主未一統之先不書宋字凡元朝
事蹟皆書元主今明史綱目前紀雖非綱目正
文但既以正朔歸元用表尊王之義則凡書元
事蹟自宜照宋元綱目之例不書元字而事涉
明祖則應增入吳國公吳王等字以昭畫一誠
如

聖諭確不可易臣等謹率分修官逐條覆檢將應去
應增之處改定數十條理合粘簽本文之上恭
呈

聖覽再元字有未便遽去者尚存五條緣至正之季

年諸戰國日起互相吞併頭緒繁多而元事錯
出於其間較之宋元綱目終卷祇二國事者微
有分別查朱子綱目於秦隋之末亦間書其國
號蓋不得已而書之以別於諸僭國也此為例
外起例而揆之尊王之義似異實同茲所存五
條可否做照此例仍書元字理合一并粘簽將
所引朱子各條分書於上恭候

皇上裁定

訓示遵行謹

奏奉

旨甚是欽此

明綱目前紀 卷上

編年起元至正十五年至二十八年閏七



明祖姓朱氏諱元璋字國瑞濠州鍾離縣東鄉人
姿貌雄傑志意廓然年十七父母伯兄相繼亡以
母陳常許從釋氏乃入皇覺寺為僧食不給西遊
合肥六安歷光固汝潁諸州者三年復還寺時海
內連年水旱民多失業元帝怠于政事荒于遊宴
民心思亂至正八年方國珍起兵海上十一年劉
福通奉韓山童起潁州謂山童宋徽宗八世孫當
主中國吏捕誅山童福通據朱皋破羅山上蔡真

陽確山犯舞陽葉縣陷汝寧光息衆至二十萬元
兵不能禦羅田人徐壽輝與鄒普勝倪文俊陷蘄
水遣將分陷江西湖廣郡縣芝蔴李彭早住趙均
用起徐州布王三孟海馬起湘漢衆各數萬時謂
之紅軍亦稱香軍他盜據地稱名號者甚衆十二
年二月定遠人郭子興與孫德崖等據濠州稱元
帥元將徽里不花憚不敢攻惟日掠良民為盜以
邀賞民怕不安亂兵焚皇覺寺僧逃散明祖欲
避兵卜于神去留皆不吉卜舉大事吉玆躍而立
大喜遂以閏月朔入濠城門者疑為謀執之欲加

害或告子興子興遣追至見明祖狀貌異常人留
為親兵命長九夫戰輒勝妻以所撫馬公女是為
高皇后明祖時年二十五矣始子興與孫德崖等
同起各不相下德崖謀傾子興會元帥破徐州芝
蔴李走死彭早住趙均用奔濠二人本盜魁素有
名德崖與子興反屈已下之遂為所制早住頗有
智數均用唯唯而已子興禮彭而輕趙趙斡之德
崖遂與均用謀伺子興出執之通衢械於孫氏將
殺之明祖在淮北聞難亟歸道過故人止之曰郭
公已被執并欲執公明祖曰郭公於我厚有難不

救非義也馳至郭氏語其諸子曰我公素厚彭而
薄趙禍必趙發此非彭不可解乃與子興二子訴
早住早住曰吾在孰敢魚肉而翁者即會左右呼
兵出明祖亦披甲執兵與俱至孫氏圍其家破械
負子興歸子興遂得免是冬元將賈魯圍濠州子
興德崖乃釋憾共拒之十三年春魯死五月元兵
解圍去彭趙各稱王子興稱元帥如故六月明祖
歸鄉里募兵得七百餘人選子興喜署為鎮撫明
祖見羣帥無足謀乃以七百人屬他將獨與鄉里
壯士徐達湯和吳良吳禎花雲陳德顧時費聚耿

再成耿炳文唐勝宗陸仲亨華雲龍鄭遇春郭興
郭英胡海張龍陳桓謝成李新張赫張銓周德興
二十四人南畧定遠張家堡民兵號驢牌寨者孤
軍乏食明祖以計說降之得壯士三千人是夜襲
元知院老張義兵帥繆大亨營于橫澗山破之後
降其衆二萬并軍而南定遠人馮國用及弟國勝
亦率衆來歸國用說明祖曰金陵龍蟠虎踞帝王
之都先拔以為根本倡仁義收人心勿貪子女奴
帛大業可成也明祖偉其言道過定遠人李善長
來謁留置幕下掌書記善長有智計策事多中明

祖問四方戰鬪何時定乎對曰漢高帝起布衣豁
達大度知人善任五載成帝業今元綱既紊天下
土崩瓦解公法漢祖所為天下不足定也明祖稱
善與攻滌陽下之彭越遣人邀帝祖守盱眙明祖
辭不往未幾早往死均用益狠戾將害子興明祖
遣人說之均用又聞明祖兵盛心頗恐子興乃得
就明祖于滌子興初至見明祖兵三萬號令嚴整
甚悅居久之惑讒言稍奪明祖兵明祖事子興愈
謹將士有所獻高后輒遣子興妻元兵來明祖又
數却之子興愧悟疑釁漸釋是歲秦州人張士誠

陷興化據高郵十四年士誠自稱誠王國號大周
改元天祐元帝命右丞相脫脫出討衆號百萬大
破士誠于高郵分兵圍六合六合求救子興難之
明祖曰六合破次將及滌子興悟遣他將行皆畏
元兵託言禱神勿吉子興使明祖禱明祖曰事之
可否當斷於心何必禱也率師東之六合與耿再
成守瓦梁壘元兵不敢逼尋大至來攻明祖設伏
澗側令再成佯走誘之渡澗伏發元兵下馬走城
中鼓譟出元兵大敗明祖度元兵尚強具牛酒遣
父老還所獲馬言城中備他盜耳高郵巨寇未滅

奈何移兵戮良民元狩引去滁城以完時脫、既
破士誠軍聲大振而元帝中讒言遽削其官去江
淮亂益熾子興遂欲據滁王明祖曰滁四面皆山
舟楫商旅不通非可旦夕安也事遂止虹縣人鄧
愈來歸明祖姊夫李貞携其子保、來明祖兄子
文正亦至保、年十四明祖命高后養為子曰朱
文忠

紀元至正十五年

宋韓林兒龍鳳元年 天完徐壽輝治平五年 周張士誠天祐二年

夏六月明祖自和陽渡江克太平始自稱為大元帥

春滁乏食明祖欲以計取和州子興曰如何明祖
曰選勇敢士三千椎髻左衽衣青衣腹背懸廬州
路義兵號以四橐駝載賞物聲言送使者入賞和
陽將士和陽兵見之必納無疑因以絳衣兵萬人
繼其後約相距十餘里俟青衣軍薄城舉火為應
絳衣兵鼓行而趨取之必矣謀既定子興命張天
祐將青衣兵趙繼祖為使者前行耿再成將絳衣
兵繼後天祐等至陝陽關和陽人聞廬州義兵至
父老以牛酒出迎會日午天祐兵從他道就食誤
前約再成候過期不見舉火意天祐必已進遽率

明綱目前編
絳衣軍抵城下城中人覺有兵元平章也先帖木
兒急閉城門以飛橋繼兵出戰再成戰不利中天
走衆皆潰元兵追奔三十餘里至千秋壩日暮收
軍還天祐至適與元兵遇急擊之追至小西門城
上抽橋急天祐兵奪橋登元兵爭橋總管湯和揮
刀斷其索天祐等以石塞門據其城也先帖木兒
夜遁再成敗衆奔歸報言天祐等並陷沒子興大
驚俄又報元兵且至遣使招降則益恐召明祖謀
時兵皆出城中守脩弱明祖悉滁三門兵於南門
闌塞街市呼使者入叱膝行見子興子興失辭衆

欲殺使者明祖曰兵出城虛若殺其使彼將謂我
怯殺之滅口是速其來也不如縱之歸揚以大言
彼必憚不敢進子興從之元兵果遁子興不知天
祐已援和州命明祖率兵二千收敗卒至中途再
成潰兵亦集得千餘人合將之南越陡陽閔令軍
士息期初昏人然十炬為疑兵明祖自率鎮撫徐
達參謀李善長勇士數十人徑進暮抵和陽始知
天祐已據城使人呼天祐天祐舉火明祖免胄示
之乃入天祐初據城懼不能守欲收子女財物歸
滁州明祖至乃與諸將為城守計元兵來攻自西

明祖擊破之抵雞籠山降其寨帥元兵乘明祖出
來攻和陽幕官李善長督兵戰却之殺獲甚衆元
兵走渡江時濠帥孫德崖乏糧率所部就食和州
求入城假居數月郭子興聞大怒來和德崖聞子
興至欲他往軍先發德崖留後明祖送其軍出城
行二十里城中報滁軍與德崖軍鬪德崖為子興
所執祖明呼耿炳文吳禎策騎還德崖軍聞變皆
忿抽刃扼道擁明祖行數里德崖弟過之欲加害
有張姓者語衆曰吾帥在河陽存亡未可知萬一
無事而先害朱公郭公必逞憾于吾帥姑待我往

門踰墮轉攻北門明祖命開門擊之元兵阻墮大
敗走子興命明祖總守和陽位諸將上明祖秘其
檄期旦夕會時席尚右諸將入解皆踞右明祖故
後至就左白事者雁列衆矐視不省明祖剖決如
流始稍屈時方議甃城期以三日諸將後明祖
出檄南面坐曰奉命總諸公兵今甃城後期如軍
法何諸將惶恐謝明祖令搜軍中所掠婦女縱還
家和民大悅元兵十萬攻和明祖以萬人拒守三
月食且盡而元太子禿堅樞密副使絆住馬民兵
元帥陳瑄先分屯新塘高望青山雞籠山絕餉道

明紀前編
觀之張入城見子興鎖德崖項對飲還告曰幾害
兩人今彼此無恙事不難釋衆猶怒張力解子興
聞明祖執如失左右手遣徐達往代達挺身詣軍
曰歸我朱公子我亦歸而帥衆不可張姓復勸諭
之明祖乃得還未幾達亦歸子興憾德崖甚以明
祖故強釋之邑邑不樂三月發病卒歸葬滁州德
崖聞子興死欲來統其軍子興子天叙懼以軍事
屬明祖夏四月劉福通自碭山夾河迎韓山童之
子林兒居亳立為皇帝又稱小明王國號宋建元
龍鳳福通自為丞相加大保遣人詣河陽授郭天

叙都元帥張天祐右副元帥明祖左副元帥明祖
不肯受曰大丈夫寧制于人耶但用其年號以行
師是月懷遠人常遇春來歸五月明祖謀渡江患
無舟時雙刀趙俞通海父子廖永安兄弟趙庸張
德勝葉昇桑世傑華高等以舟千艘結水寨于巢
湖數與廬州左君弼戰不勝遣通海間道詣明祖
明祖喜謂徐達等曰方欲渡江而巢湖水師至天
贊我也親往巢湖收其軍元平章蠻子海牙集樓
船塞桐城聞馬場河諸隘不得達忽大雨湖漲明
祖潛發巢湖舟皆魚貫出至黃墩雙刀趙以所部

明紀前編
降于天完陳友諒餘舟至和陽命永安德勝通海
等將之擊蠻子海牙於裕溪口蠻子海牙舟高大
不利進退永安等搥舟如飛左右奮擊大敗其衆
與諸將定渡江計諸將請直趨集慶明祖曰取金
陵必自采石始采石南北喉襟得采石金陵可圖
也六月朔明祖率徐達馮國用邵榮湯和李善長
常遇春鄧愈耿君用毛廣廖永安各引舟出江口
日暮大雷雨遂止明日西北風順舟師發永安請
所向明祖曰采石大鎮守必固牛渚磯前臨大江
彼難為脩攻之必克乘風引帆直達牛渚元兵陳

磯上其下巨舟相次距岸三大餘莫能登常遇春
飛舸至明祖麾之前過春應聲奮戈直前岸兵接
其戈乘勢躍而上大呼跳盪元軍披靡諸將鼓勇
繼之遂奪牛渚采石鎮兵驚潰遂拔之緣江諸壘
望風迎附諸將以和陽飢乏欲取資蓄歸明祖曰
渡江幸捷當乘勝前若舍而歸江東非我有也令
悉斷舟纜推置急流中舟皆順流下諸軍大驚明
祖曰此去太平甚近舍此不取將奚為令軍中食
食已徑趨太平城下急攻之元平章完者不花遁
執其萬戶納哈出太平路總管靳義赴水死明祖

日義士也禮葬之耆儒李習陶安率父老出城迎
安謂習曰龍姿鳳質非常人也我輩今有主矣明
祖入城秋毫無犯先令李善長為榜戒戢軍士一
卒違令即斬以徇城中肅然明祖召陶安李習語
安曰方今四海鼎沸豪傑並爭攻城屠邑互相雄
長然其志在子女玉帛非有撥亂安天下之心明
公率眾渡江神武不殺人心悅服以此行弔伐天
下不足平也明祖改太平路為府以李習知府事
置太平興國翼元帥府諸將奉明祖為大元帥明
祖命李善長為帥府都事潘庭堅為教授汪廣洋

為令史陶安叅幕府事太平四面皆元兵平章阿
魯灰及蠻子海牙以巨舟截采石江閉姑孰口斷
歸路方山寨民兵元帥陳瑄先與其將康茂才數
萬眾逼城下明祖遣徐達湯和鄧愈引兵出姑孰
東迎戰復令別將由間道出其後達等轉戰至城
北夾擊之擒瑄先悉降其眾阿魯灰蠻子海牙聞
引兵還駐裕溪口是月徐達克溧水州秋七月張
天祐率諸軍攻集慶勿克而還八月徐達克溧陽
裨將習伯容克蕪湖九月郭天叙張天祐再攻集
慶陳瑄先叛與元御史大夫福壽合兵拒秦淮水

上天叙天祐並戰死於是郭子興部將悉歸明祖矣

冬十二月大元帥釋元萬戶納哈出北歸

納哈出木華黎裔孫也明祖待之甚厚納哈出居常鬱鬱明祖遣降將萬戶黃傳察其去就納哈出曰我北人不能忘北明祖因資而遣之

官兵圍毫宋劉福通以其主韓林兒走安豐

丙至正十六年宋韓林兒龍鳳二年天祐三年天完徐壽輝

春二月大元帥擊元將蠻子海牙於采石大敗之

蠻子海牙聞郭天叙敗復扼采石江欲伺間攻太

平明祖遣常遇春設疑兵分散勢而自以大兵薄之戰既合遇春搥輕舸衝海牙為二左右縱擊

飛礮碎其舟大敗之盡獲其戰艦海牙脫身走集

慶江南北復通元扼江之兵遂盡

張士誠陷平江

自高郵徙都之改平江路為隆平府遣將陷松江嘉興湖州諸路

天完倪文俊迎其主徐壽輝都漢陽

文俊自為丞相以部將陳友諒為領兵元帥

三月大元帥克集慶元御史大夫福壽死之

陳瑛先之叛也趨滎陽為民兵所殺其子兆先復
收餘衆屯方山與元兵合三月明祖自將取集慶
至江寧鎮攻兆先營破之擒兆先盡降其兵三萬
六千擇驍勇五百人置麾下夜令環帳寢悉屏舊
人獨留馮國用侍卧榻明祖酣寢達旦五百人感
悅誓以死報明祖進軍未及城五里鼓噪進福壽
督兵戰擊敗之福壽閉城拒守明祖麾師薄城圍
用所將五百人奮勇先登遂克之福壽猶督兵巷
戰兵潰坐伏龜棲前指揮左右更拒戰或勸之道
福壽叱而射之戰不已遂死於兵平章阿魯灰叅

政伯家奴集慶路達魯花赤達尼達思皆戰死蠻
子海牙走投張士誠康茂才降凡得軍民五十餘
萬明祖入城召官吏父老諭曰元失其政兵戈並
起我來為民除亂耳其各安職業無恐賢人君子
吾禮用之舊政不便吾除之吏無貪暴殃吾民
大悅明祖周覽城郭謂徐達等曰金陵真形勝地
達對曰此天授也改集慶路為應天府置上元江
寧二縣辟儒士夏煜孫炎楊憲等十餘人具棺衾
葬福壽以旌其忠

大元帥遣徐達取鎮江元平章定定死之六月鄧愈

克廣德

初元帝聞江浙亂命湖廣行省平章阿魯灰會淮南行省平章蠻子海牙淮西道宣慰使完者不花攻和州復命江浙行省叅政納麟哈刺會定定守常州鎮江至是集慶破阿魯灰等或死或走納麟哈刺以老去定定勢益孤而張士誠已自淮東渡海據平江破常州轉掠浙西矣當是時定定屯鎮江別不花楊仲英守寧國青軍帥張明鑑據揚州八思爾不花守徽州石抹宜孫守處州其弟厚孫守婺州宋伯顏不花守衢州而池州為天完將陳

友諒所陷與太平接境明祖既定集慶慮江左浙右諸郡為士誠友諒所并欲先發兵取鎮江患諸將不戢士卒為民害召其尤縱者詰責將誅之李善長懇救始免明祖乃命徐達為大將率湯和張德勝廖永安等取鎮江戒曰吾起兵未嘗妄殺汝等當體吾心有犯者軍法無赦達至鎮江攻克之定定及守將段武戰死達號令嚴肅城中民不知有兵夏四月克金壇縣六月鄧愈克廣德路大元帥遣楊憲致書於張士誠

書曰昔隗囂稱雄于天下足水今擅號於姑蘇事

勢相等吾深為足下喜睦隣守境古今所貴竊甚
慕焉自今信使往來毋惑譏言以生邊釁士誠得
書不悅留憲不遣

秋七月大元帥自立為吳國公

以元行御史臺為公府置江南行中書省吳國公
兼總省事李善長宋思顏為參議李夢庚郭景祥
為左右司郎中陶安等為員外郎孔克仁王愷為
都事思顏等雖為省僚軍機進退賞罰章程十九
決于善長吳國公又置行樞密院帳前總制親兵
都指揮使司左右翼元帥府五部都先鋒首都鎮

撫司理問所提刑按察使司兵馬指揮司營田司
等官 聘鎮江秦從龍至吳國公親至龍江迎入
與同處朝夕訪以時事從龍盡言無隱吳國公事
無大小悉與之謀從龍薦陳遇吳國公發書聘之
至引湯文徵伊呂先主聘孔明為喻遇至與語大
悅留幕中叅密議吳國公嘗三造其居與從龍皆
稱先生而不名

張士誠兵攻鎮江不克吳國公遣徐達圍常州

士誠既陷常州挾江東叛將陳保二攻鎮江統軍
元帥徐達禦之敗其軍於龍潭達進攻常州士誠

遣將來援達離城十八里設二覆待之令總管王均用為奇兵而自督軍戰鋒既交均用以鐵騎橫衝其陣亂士誠兵退走過伏大敗獲其張湯二將士誠懼奉書請和願歲輸糧及金銀吳國公數其開釁罪且令歸使臣將校即班師士誠不報十一月士誠兵突出扼達于牛塘會常遇春廖永安來援夾擊大敗之生擒其將張德士誠遣呂珍馳入常州達復進師圍之時吳國公如鎮江先謁孔子廟分遣儒士告諭鄉邑勸農桑築城閉壘命總管徐忠置金山山水寨斷南北寇兵

丁至正十七年

宋韓林兒龍鳳三年天完徐壽輝治平七年是歲張士誠降於元檀命如故

春二月吳國公遣耿炳文取長興守之

炳文自廣德取長興張士誠將趙打虎以兵三千逆戰敗之遂克其城獲戰船三百餘艘擒守將李福安等長興據太湖口陸通廣德壤接宣歙為江浙門戶吳國公以炳文為元帥守之有儒士溫祥卿者避亂來歸炳文引入幕府畫守禦計甚悉士誠步騎遂不敢出廣德窺宣歙

三月徐達克常州以湯和守之

圖久城中食且盡呂珍甯遁達取其城吳國公命和鎮守以高復知常州府率常過春秦世傑取馬馱沙克之常與士誠密通士誠曰遣人遊說囑以子女玉帛和不為動巡守嚴密使內奸不出外奸不入

夏四月吳國公克寧國元百戶張文貴死之

徐達常過春攻寧國元守臣別不花楊仲英久不下元帥朱亮祖笑出戰過春中流矢裹創聞吳國公親往督戰拔之仲英等降百戶張文貴殺妻妾自刎死諸將縛亮祖見吳國公問曰爾將何如對

曰生則盡力死則死耳吳國公壯而釋之使從攻伐得軍士十餘萬馬二千餘匹屬縣太平旌德南陵涇縣皆下

五月吳國公遣張鑑取泰興

鑑與何文政攻泰興張士誠遣兵來救徐大興張斌擊敗之擒士誠將楊文德遂克泰興

六月吳國公遣趙繼祖取江陰以吳良守之

士誠兵據秦望山繼祖引兵奪之克江陰吳國公命良守之時士誠北有淮海南據浙西江陰枕大江扼姑蘇通州道繼祖既取江陰士誠舟師遂不

敢沂大江上金焦侵軼路絕吳國公諭良曰江陰
我東南屏蔽汝約束士卒毋外交毋納遁逃毋貪
小利與爭鋒惟保境安民而已明年復以良弟禎
同守良夜宿城樓枕戈達旦訓將練士常如寇至
暇則延儒生講論經史新學宮立社學大開屯田
均徭省賦民甚賴之

秋七月徐達取常熟敗張士誠兵擒其弟士德士誠
降元

徐達徇宜興攻常熟士德以兵逆戰大敗為前鋒
趙德勝所擒士德小字九六驍勇善戰能得士心

浙西地皆其所定常州長興江陰既為達等取士
誠兵不得出勢漸蹙思復降元及士德被擒士誠
益喪氣降元計遂決元江浙右丞相達識鐵木兒
言于朝元帝授士誠太尉士德在應天不食死

吳國公遣胡大海鄧愈攻徽州取之元萬戶吳訥自
殺

大海愈取績溪進攻徽州元守將八思爾不花及
建德萬戶吳訥拒戰大海擊敗之拔徽州城訥退
守遂安大海追敗之于白際嶺訥自殺吳國公命
愈守徽別遣將取黟縣大海克休寧進攻婺源會

元苗帥楊完者以兵十萬來復徽州大海還師與
戰于城下愈自城中出合擊大破之楊完者走徽
州遂定

冬十月常遇春克池州斬天完守將

五月遇春帥駐銅陵池州路總管陶起祖來降且
言池州可取狀遇春遣趙忠王敬祖攻池之青陽
縣天完將趙普勝來拒敬祖以數十騎衝其陣
亂乘勢奮擊普勝大敗遁普勝即雙刀趙故巢湖
水寨帥已降而叛去者也遇春率廖永安等自銅
陵進攻池州破其北門斬天完守將洪元帥得糧

九千餘石薄暮天完將復以戰艦百餘逆戰又擊
敗之陳友諒始與吳國公隙

吳國公遣繆大亨取揚州

青軍帥張明鑑逐元鎮南王孛羅普化據揚州屠
城中居民為食大亨攻之明鑑降吳國公命張德
林耿再成守之以大亨總制揚州鎮江大亨有治
畧寬厚不擾而治軍嚴毅禁暴除殘吏民畏愛

十一月天完將明玉珍據重慶

玉珍隨州人為壽輝元帥守沔陽率斗船掠糧川
峽間聞重慶無重兵用部將戴壽計溯江襲之走

元守將完者都執右丞哈麻禿遂陷重慶壽輝以
玉珍為隴蜀行省右丞蜀中郡縣相繼降附

天完陳友諒殺其主將倪文俊併其軍

友諒舊隸文俊麾下文俊以丞相專天完國政在
黃州友諒襲殺文俊并其兵自稱宣慰使尋稱平
章政事明年正月友諒陷安慶使趙普勝守之以

爭池州

戊至正十八年

宋韓林兒龍鳳四年
治平八年

天完徐壽輝

春正月吳國公將桑世傑戰死於石牌張士誠將樂
瑞降

士誠初據高郵江陰石牌寨盜朱定導士誠由通
州渡江遂有江南以定為泰攻瑞為元帥戊石牌
吳國公既取江陰瑞尚據石牌吳國公命廖永安
俞通海及世傑攻之瑞力拒世傑躍馬陷陳死永
安通海攻益急瑞不能支遂降士誠窺江路絕
鄧愈克婺源

愈遣部將王弼孫虎等攻婺源與元守將鐵木兒
不花戰城西自旦至日昃猶不下乃分門逼之三
道並進拔其城斬鐵木兒不花
二月吳國公以康茂才為營田使

諭曰此因兵亂隄防頽圯民廢耕耨故設司專掌水利令軍務實殷用度為急理財之道莫先於農春作方興慮旱澇不時有妨農事故命爾此職三月吳國公遣提刑按察司僉事分巡麗縣原輕罪鄧愈胡大海克建德路以朱文忠守之

愈大海會文忠由徽州昱嶺闕進攻建德道遂安未及三十里元長槍帥徐子貞以兵來拒愈等擊敗之追至淳安元兵望風奔潰復追擊二十餘里遂安守將來援大海又擊敗之軍抵建德元叅政不花院判慶壽等棄城遁改路為府元江浙行省

左丞苗帥楊完者遣兵來攻愈擊斬其將李副樞餘衆潰降其溪洞兵三萬留文忠守建德楊完者復來攻文忠擊走之

夏四月天完平章陳友諒遣將趙普勝復取池州

普勝自樅陽破池州守將趙忠被執是月友諒陷龍興又破瑞州尋遣將分陷邵武吉安自以兵陷撫州已又破建昌贛汀衢信諸路以江州為治所宋劉福通陷汴梁迎其主韓林兒都之

十六年福通遣其黨分道畧地李武崔德破潼關陝虢十七年陷商州下武關分略同華諸州元將

察罕帖木兒與李思齊來援擊敗之武德衆潰散
毛貴陷膠萊益都般陽山東郡諸縣皆下福通遂
攻汴梁分軍三道閔先生破頭潘馮長舅沙劉二
王士誠趨晉冀白不信大力教李喜二趨閔中元
鎮守黃河義兵萬戶田豐叛降於福通陷濟寧福
通陷大名曹濮衛輝白不信陷興元入鳳翔為察
罕思齊所破走入蜀田豐復陷東平濟寧東昌益
都廣平順德毛貴又數敗元兵陷清滄州據長蘆
鎮尋陷濟南殺元宣慰使董搏霄于南皮陷薊州
犯澶州畧柳林以逼大都元帝懼徵四方兵入衛

議遷都以避其鋒大臣諫乃止貴旋為元兵所敗
還據濟南福通攻破汴梁元守將行貞遁迎林兒
自安豐徙都之福通勢大熾閔先生破頭潘又分
其軍為二一出絳州一出沁州踰太行破遼州潞
州遂陷冀寧攻保定不克陷完州掠大同興和塞
外諸郡陷上都焚毀諸宮殿轉掠遼陽陷之殺懿
州路總管上都宮闕盡廢元帝自此不復北巡而
李喜二餘黨復陷寧夏畧靈武諸邊地元疆宇日
蹙帝方溺於娛樂不恤國政而河山東民携老幼
流入京師重以饑疫死者枕藉韓林兒本起盜賊

無大志又聽命福通徒擁虛名諸將在外者率不
遵福通約束所過焚劫甚至啖老弱為糧數攻下
城邑元兵亦從後復之不能守惟毛貴稍有規畫
據山東者三年

六月朱文忠取浦江招義門鄭氏還里

縣之感德鄉有鄭氏者自宋元聚族同居元旌表
為義門兵亂後避居山谷文忠克城禁焚掠示恩
信招還居故里以兵護之

張士誠兵侵常熟廖永安擊破之

永安與戰于福山港士誠兵大敗七月又敗之於

通州狼山獲其戰艦八月士誠兵犯江陰守將吳
良又敗之

秋九月元苗帥員成等以其衆降

員成楊完者部將也張士誠據平江元江浙行省
丞相達識鐵木兒慮士誠侵之召楊完者守杭州
累授江浙左丞完者驕橫達識鐵木兒苦其逼已
又陰約士誠以兵攻其營完者自縊部衆潰散士
誠遂有杭州南至紹興員成等欲為完者報仇率
元帥李福劉震黃寶蔣英以兵三萬自桐廬請降
於朱文忠文忠遣夏子實以部騎千人統其衆於

新城送員成應天

冬十月胡大海取蘭谿

大海至婺之鄉頭擒元萬戶趙伯顏不花雲完都等平其五壘進攻蘭谿元兵千餘出戰敗之克其城獲元廉訪使趙秉仁等分兵守要害進攻婺州徐達邵榮克宜興

達久攻宜興不下吳國公遣使謂曰城小而堅未易猝拔聞城西通太湖口士誠餉道所由出若以軍斷之彼軍乏食必破矣達遣丁德興以兵扼太湖口而興榮併力急攻城遂拔以楊國興守之是

役也廖永安乘勝擊士誠兵於太湖深入遇士誠將呂珍與戰永安舟膠淺被執送平江士誠愛其才勇欲降之不屈遂為所囚

十一月吳國公置管領民兵萬戶府

諭省臣曰古者寓兵於農今兵爭之際當因時制宜所定郡縣民間豈無武勇之材宜精簡拔立府領之俾農時則耕閒則練習有事則用之事平有功者陞賞無功者還令為民如此則民無坐食之弊國無不練之兵以戰則勝以守則固庶幾寓兵於農意也

十二月吳國公自將取婺州令儒士講經史

胡大海攻婺州久不下吳國公命李善長徐達居守自率常遇春楊璟等兵十萬由寧國道徽州召故老耆儒訪民事賜以帛聞前學正朱升名召問之對曰高築墻廣積糧緩稱王吳國公大悅命預帷幄密議師至德興聞張士誠兵據紹興之諸暨乃引兵道蘭谿至婺令人招諭城中不下督兵圍之元處州守將石抹宜孫遣部將率獅子戰車自松溪來援吳國公曰道狹車戰適取敗耳遣大海養子德濟誘其兵于梅花門外縱擊大敗之城降

執元守將石抹厚孫吳國公整兵入城民皆安堵先一日有五色雲見城西如東蓋城中人以為異及城下乃知為吳國公駐兵地吳國公置中書分省于婺州改婺州路為寧越府以王宗顯知府事發倉廩賑貧民辟儒士范祖幹葉儀既至祖幹持大學進曰治天下不出此書吳國公命剖晰其義甚加禮貌欲官之皆辭召儒士許元葉瓚玉胡翰吳況汪仲山李公常金信徐孳童翼戴良吳履張起敬孫復會食省中日令二人進誦經史數陳治道下令禁酒選寧越七縣富民子弟充宿衛名曰

御中軍

吳國公遣使慶元招方國珍

國珍據慶元台溫三路元授以行省叅政擁兵自如吳國公既取婺州遣主簿蔡元剛往慶元招諭之

己亥至正十九年

宋韓林兒龍鳳五年

天完徐壽輝

吳國公既撫定寧越欲遂取浙東未下諸郡集諸將諭之曰克城雖以武而安民必以仁吾師比入建康秋毫無犯故一舉而遂定今新克婺城民始獲甦政當撫恤使民樂於歸附則彼未下州郡亦

必聞風而歸吾每聞諸將下一城得一郡不妄殺人輒喜不自勝為將者能以不殺為心非惟國家所利在已亦蒙其福爾等從吾言則事不難就大功可成矣遂遣胡大海率師攻諸暨規取紹興遣耿再成率師屯縉雲黃龍山規取處州是月命寧越知府王宗顯開郡學延儒士葉儀宋濂為五經師戴良為學正吳沉徐厚等為訓導時喪亂之餘學校久廢至是始聞弦誦之聲

胡大海取諸暨

張士誠守將戰敗宵遁萬戶沈勝以衆降大海入

城其衆復作亂大海擊敗之擒四千餘人遂改諸
暨為諸全州尋於州置樞密分院命大海總兵攻
紹興

邵榮敗張士誠將李伯昇於臨安

榮敗士誠兵於餘杭遂率兵攻湖州擊敗士誠兵
追至城下敵兵入城拒守榮兵圍之城中悉兵出
戰榮兵不利退屯臨安謀知士誠欲來攻先設伏
以待戒戰士寇至堅守勿動俟山上旗舉齊擊之
既而伯昇率兵奄至攻壁不能下榮度其衆已疲
舉旗諸軍鼓譟出伏兵俱發敵衆大亂自相蹂躪
退守榮攻之弗克引還

三月吳國公宥獄囚

方國珍以慶元台溫三郡附於吳國公

蔡元剛至慶元國珍與其下謀曰江左號令嚴明
恐不能與抗况與我為敵者西有士誠南有閩莫
若姑示順從藉為聲援以觀其變正月遂遣使奉
書獻金幣吳國公復遣孫養浩報之至是國珍遣
郎中張本仁以三郡獻且以次子闡為質吳國公
曰既誠心來歸便當推誠相與如青天白日何自

日知錄前錄
懷疑而以質子為哉乃厚賜閔而遣之

夏四月徐達遣俞通海復池州

陳友諒將趙普勝既攻陷池州守以別將而自據
樅陽水寨數往來侵掠建德太平陵陽石埭等縣
徐達患其侵軼遣俞通海等往擊敗之俘其將趙
牛兒等普勝棄舟陸走盡獲其舟數百遂復池州
吳國公在浙東聞之甚喜陞達為奉國工將軍

吳國公遣陸仲亨取衢州不克而還

五月吳國公以常遇春胡大海守寧越六月遂還應
天

吳國公將還應天以寧越浙東重地命遇春守之
又名大海于紹興既至諭之曰衢處紹興進取之
宜悉以付爾宋伯顏不花在衢其人多智術石抹
宜孫守處善用士紹興為士誠將呂珍所據數郡
與寧越密邇爾與同僉遇春同心協力乘間取之
此三人皆勦敵不可忽也時朱文忠守建德吳良
守江陰湯和守常州皆數擊敗士誠兵以故吳國
公得久留婺六月還應天

張士誠將呂珍圍諸全州胡大海救却之

大海自寧越率兵往救珍堰水以灌州城大海奪

堰反以灌珍：勢盛乃於馬工折矢求解兵大海
許之都事王愷曰彼猶賊難信不如因而擊之可
大勝也大海曰彼若再來吾有以待之且吾許人
言而背之不信縱其去而擊之不武遂引兵還人
皆服其威信

秋八月吳國公遣朱文遜取無為州

元將河南平章察罕帖木兒復汴梁宋劉福通以其
主韓林兒走安豐

察罕帖木兒數破城盡復關隴大發秦晉之師會
汴城下屯杏花營以諸軍環城而壘林兒兵出戰

輒敗嬰城守百餘日食將盡福通計無所出挾林
兒從百騎開東門遁還元帝以察罕為河南平章
時宋將毛貴已為其黨趙均用所殺均用又為續
繼祖所殺所部自相攻擊獨田豐據東平勢稍強
九月徐達張德勝克潛山陳友諒殺其將趙普勝

普勝屢擾境上吳國公患之啗普勝客入友諒軍
間之普勝不知見友諒使者輒訴功悖：有德色
友諒忌之九月達德勝率兵自無為州登陸徑至
浮山寨擊走普勝部將于青山德勝又擊斬友諒
部將郭泰于沙河遂克潛山縣遣詹元帥守之達

還鎮池州友諒既疑普勝貳己入憤潛山之敗乃詐以會軍安慶為名自江州猝至普勝以燒羊迎於雁汊甫登舟友諒即斬普勝并其軍遂有襲池州之意

常遇春克衢州元總管馮浩死之

遇春自寧越率兵攻衢州建奉天旗樹柵圍其六門造呂公車仙人橋長木梯懶龍爪擁至城下高與城齊又穴地道攻之元守臣廉訪使宋伯顏不花悉力備禦以東葦灌油燒呂公車架千斤稱鉤懶龍爪用長斧斫木梯於城內築夾城以防穴道

遇春攻之弗克乃以奇兵出不意突入南門甕城毀其戰具急攻之元樞密院判張斌密遣使約降日暮引軍士出小西門迎外軍宋伯顏不花不知猶督兵拒戰俄城中舉火遇春軍已入城馮浩赴水死擒宋伯顏不花及院判朶粘等以唐君用夏義朱亮祖守之遇春還寧越

吳國公遣夏煜授方國珍官國珍不受

冬十一月胡大海克處州元守將石抹宜孫走建寧初耿再成兵駐黃龍山元守將石抹宜孫遣兵分扼桃花嶺葛渡樊嶺龍泉以拒久之兵士怠弛其

將胡深叛宜孫間道來降言處州易取大海喜即
出軍抵樊嶺與再成合攻之連接桃花嶺葛渡二
皆遂薄城下宜孫戰敗走建寧於是處州七邑皆
降以朱文剛李祐之耿再成守之當是時元守兵
已弱且中原亂故江左浙右諸郡兵至即下吳國
公地遂西與陳友諒鄰

十二月張士誠兵侵分水李文忠遣何世明擊敗之
三月士誠寇建德文忠禦之於東門使別將潛由
小北門間道繞出其陣後夾擊大破之士誠兵遁
四月復遣兵爭建德據分水嶺文忠遣元帥何世

明破其營斬首五百士誠益憤遣張夏二元帥花
將軍據分水縣之新城三溪結寨以遏文忠兵世
明率兵擊之斬元帥花將軍以下千餘人焚其
營壘分水兵潰去自是士誠不敢窺嚴婺

天完平章陳友諒徙其主徐壽輝都江州自稱漢王
始友諒破龍興壽輝欲自漢陽徙都之友諒不可
數遣人止其行壽輝遽發漢陽次江州江州友諒
治所也伏兵郭外迎壽輝入即閉城門悉殺其所
部即江州為都奉壽輝以居友諒自稱漢王置王
府官屬

庚至正二十年

宋韓林兒龍鳳六年五月亡漢陳友諒治平十年是歲閏五月

春正月吳國公遣楊憲往諭方國珍

夏煜自慶元還具言國珍懷姦詐狀非兵威無以服之吳國公方急友諒士誠復遣憲往諭時國珍歲沿海舟為元漕張士誠粟十餘萬石於京師元累進國珍官至江浙行省左丞相衢國公分省慶元國珍受之如故特以甘言謝吳國公及憲至以吳國公書示之竟不省

二月元福建行省叅政袁天祿以福寧降

三月吳國公徵劉基章溢葉琛宋濂至

基字伯溫青田人元進士官儒學提舉不得志自投劾歸基雄邁有奇氣於經史無所不貫尤精天文嘗游西湖有異雲起西北同游者以為慶雲將紀以詩基縱飲徐言曰此天子氣也應在全陵後十年當有王者起其下時昏駭為狂言惟西蜀趙天澤以為諸葛孔明儔也方國珍作亂海上行省辟基為都事時方議招撫基言國珍兄弟首亂宜捕誅行省及朝中執政受國珍賄責基擅威福羈管紹興國珍遂愈橫盜賊竟滿天下亡何行省復

辟基勸山寇與石抹宜孫守處州有功為執政所抑遂棄官還青田著郁離子以見志時避國珍亂者率依基得免琛字景淵麗水人博學有才為石抹宜孫畫策誅山賊授行省元帥處州下避走建寧溢字三益龍泉人師事王毅志聖賢學賊陷龍泉溢率壯士復其城因平松陽麗水諸寇論功授浙東都元帥溢辭不受退隱匡山又避兵入閩濂字景濂浦江人嘗遊柳貫黃潛之門兩人皆大儒亟遜濂自謂弗如嘗薦授翰林編修辭不行入龍門山著書踰十餘年初吳國公取婺州已召見濂

及下處州又有薦基及溢琛者吳國公素聞基等名即遣使以書幣徵之時總制孫炎先以君命請基至是四人同赴應天入見吳國公大喜賜坐勞之曰我為天下屈四先生因從容問天下紛、何時定乎溢對曰天道無常惟德是輔惟不嗜殺人者能一之耳基即陳時務十八策吳國公並納之語基有至計毋惜盡言基遂參帷幄每計畫立就人莫能測暇則敷陳王道吳國公每恭已以聽呼老先生而不名曰吾子房也嘗問郎中陶安基等四人何如對曰臣謀畧不如基學問不如濂治民

之才不如溢琛時以為名言

夏五月陳友諒攻池州徐達常過春擊敗之

過春自寧越率師攻張士誠兵於杭州久不克吳國公知友諒必來寇四月召過春赴池州助達授以方畧五月友諒果率輕兵襲池州達過春設伏以待友諒兵至伏發盡覆其軍於九華山下斬首萬人生擒三千過春曰此勦旅也不殺必為後患達不可以狀聞吳國公馳使語勿殺過春先以夜阮其人過半吳國公於是始命達盡護諸將友諒既敗還偽使告吳國公曰戰非吾意巡邊者誤

耳其矜詐如此

閏五月陳友諒克太平守將朱文遜花雲王鼎知府許瑗死之

友諒率舟師挾其主徐壽輝自江州東下攻太平城花雲等以兵三千拒戰三日不得入乃引巨舟泊城西南士卒緣舟尾攀牒而登城遂陷執文遜等雲被縛急奮躍大呼縛盡絕奪守者刀連殺五六人大罵友諒怒縛雲於舟檣叢射之雲至死罵不絕口文遜瑗鼎亦抗罵死方戰急雲妻郤氏祭家廟挈三歲兒泣語家人曰城破吾夫必死吾義

不獨存然不可使花氏無後若輩善撫育之雲被
執郤氏赴水死侍婢孫痊郤氏畢抱兒行被掠至
九江軍中惡兒啼孫氏夜投漁家脫簪珥屬養之
及陳氏敗孫往漁家竊兒走夜宿陶穴中天明渡
江漬軍奪舟去棄江中浮斷木入葦洲採蓮實哺
兒七日不死得達吳國公所後賜兒名煒文遜吳
國公養子也雲懷遠人瑗樂平人鼎儀真人

友諒弑其主徐壽輝於采石自稱皇帝率師逼應天
吳國公破走之遂復太平下安慶

友諒既克太平志益驕駐師采石弑壽輝稱帝國

號漢改元天義仍以郤晉勝為太師張必先為丞
相張定邊為太尉天完官屬悉因其舊友諒既盡
有江西湖廣地恃兵強潛遣人約張士誠合攻應
天應天大震諸將或議降或議奔據鍾山或請決
一戰劉基獨張目不言吳國公召入內基奮曰先
斬主降及言奔者吳國公曰先生計安出基曰賊
驕矣待其深入伏兵邀取之易耳天道後舉者勝
取威制勝以成王業在此舉矣吳國公從之諸將
議先攻太平以牽友諒吳國公曰不可太平吾新
築壘濠塹深固陸攻必不破彼以巨艦乘城故為

所陷今彼居上游舟師十倍於我猝難復也或請
自將迎擊吳國公曰敵知我出以偏師綴我而順
流趨金陵半日可達吾步騎亟引還已窮日矣百
里趨戰兵法所忌非良策也乃馳使諭胡大海檇
信州牽其後而令康茂才以書給友諒來友諒得
書大喜問閻者曰康公何在曰守江東橋問江東
橋何如曰木橋也遣還吳國公曰虜落吾彀中矣
命李善長夜撤江東橋易以鐵石及旦而成又築
虎口城跨新河以兵守之令馮國勝常遇春率五
翼軍三萬人伏石炭山側徐達軍南門外楊璟守

大勝港張德勝朱虎帥舟師出龍江關外吳國公
自提大軍於蘆龍山令持幟者分偃黃赤幟于山
左右戒之曰寇至即舉赤幟舉黃幟則伏兵皆起
皆嚴師以待友諒果引巨艦所號為混江龍塞斷
江撞倒山江海鰲者蔽江東下至大勝港楊璟禦
之港小舟不得並入友諒遽引退出大江徑以舟
衝江東橋見橋皆鐵石始駭連呼茂才不應遂以
千艘抵龍灣先遣萬人登岍立柵執銳甚時天酷
暑吳國公張蓋督兵見將士皆流汗即命去蓋傳
語諸軍且就食當乘雨擊之諸軍疑未信忽雲起

東北雨如注赤幟舉令諸軍奮前拔寨友諒麾軍
來爭方合雨止令發鼓震黃幟舉國勝過春伏
兵起達兵亦至德勝虎舟師並集內外合擊友諒
大敗還趨舟潮落舟膠死者無算亡戰艘數百乘
輕舸走其將張志雄降言安慶無守陷吳國公即
遣徐達馮國勝張德勝將兵追別遣余元帥取安
慶德勝追及友諒於慈湖縱火焚其舟至采石又
與大戰德勝死之友諒方少息馮國勝復以五翼
軍蹙之友諒與張定邊出覓旗軍迎戰又敗友諒
晝夜不得息遂收餘兵棄太平遁去達等追至池

州而還過春遂復太平余元帥亦下安慶而胡大
海提兵已克信州改信州為廣信府初吳國公令
康茂才給友諒李善長為以疑吳國公曰二虜合
吾何以支惟速其來而先破之則士誠膽落矣已
而士誠兵竟不出

吳國公以宋濂為儒學提舉子標受經學

六月吳國公遣使祭元將石抹宜孫於龍泉

吳國公之下婺州也獲石抹宜孫之弟厚孫并其
母令以書招宜孫不至及克處州宜孫遁入建寧
收士卒欲復處州因嘆曰處州吾所守地域可復

則復不可復則死當為處州鬼耳遂攻慶元縣執
知縣曾壽不屈過害俄耿再成兵至擊敗之宜孫
走竹口欲還福建經桃花坑連為鄉兵所邀擊宜
孫力戰而死部將李彥文收葬其屍於龍泉縣都
事孫炎以聞吳國公嘉其盡忠死事遣使祭之

秋九月張士誠將呂珍徐義攻長興耿炳文擊破之
士誠遣珍義率舟師自太湖入陳瀆港分兵據下
新橋五里牌蔣婆橋三路進兵以寇長興炳文禦
之遣元帥劉成出五里牌總管湯泉出蔣婆橋張
瑄出下新橋泉瑄皆戰歿成與相拒一晝夜勝負
未決炳文乃親率精兵與成合遂大破之獲甲仗
船艦甚衆

故天完袁州將歐普祥遣人來降

陳友諒既募普祥部將黃彬言於普祥曰公與友
諒比肩奈何下之友諒驕恣非江東敵也保境候
東師當不失富貴普祥遂遣使納款友諒遣弟友
仁攻之普祥擊敗其衆獲友仁友諒懼約分界不
相侵乃釋友仁

冬十一月吳國公召江陰守將吳良勞之

良在江陰數挫張士誠兵吳國公召良至應天勞

之日院判保障一方使吾無東顧憂其功大矣命
儒臣宋濂為詩以美之

方國珍遣使謝過

吳國公復遣夏煜諭國珍曰福基於至誠禍生於
反覆隗囂公孫述之事可以鑒矣大軍一出不可
以甘言解也國珍懼遣使隨煜來謝過

辛丑至正二十一年

宋韓林兒龍鳳七年

漢陳友諒

春二月吳國公改分樞密院為中書分省 立鹽茶

課 置寶源局鑄大中通寶錢

三月吳國公改樞密院為大都督府以朱文正為大

都督節制中外諸軍事

泗州將薛顯以城降

顯趙均用部將也守泗州均用死遂來降

方國珍遣使獻寶鞍吳國公却之

國珍治馬鞍飾以金玉遣使來獻吳國公曰吾有
事四方所需者文武才能所用者粟穀布帛他寶
玩非所好也却其獻

夏四月吳國公以李善長奏知政事

善長自初從預機畫主饋餉甚見親信諸將來歸
者察其材白用之後為吳國公布款誠使皆得自

安既叅知政事吳國公每自將征討善長皆居守將吏帖服居民安堵轉調兵餉無乏

六月漢將李明道攻信州胡大海擊擒之

明道聞大海在浙東懼其來援斷玉山之草平鎮守將夏德潤出兵爭之戰死明道攻信州益急守將胡德濟以兵少閉城拒守遣人求援于大海大海即率兵由靈溪進德濟聞引兵出城與明道力戰大海遂縱兵夾擊大破之擒明道及其宣慰王漢二獲部卒器械甚衆大海還金華送明道漢二於朱文忠文忠復送應天吳國公命皆仍舊職用

為鄉道以取江西漢二建昌將王溥弟也

秋七月漢將張定邊復取安慶

守將余元帥等戰敗奔還應天吳國公怒皆斬之八月吳國公遣使於元河南平章察罕帖木兒

察罕既定河南乃以兵分鎮關陝荆襄河洛而重兵屯太行日訓練士卒務農積穀謀大舉以復山東謀知山東羣盜自相攻擊乃大會諸將期分兵五道水陸並進自率鐵騎渡孟津踰覃懷而東復兗州東昌遣其子擴廓帖木兒直擣東平以書招田豐及王士誠降遂復東平濟寧時宋兵聚於

濟南察罕分奇兵間道出宋兵後南畧泰安逼益
都北徇濟陽章邱中徇瀕海郡邑自將大軍進圍
濟南山東惟陳孫頭守益都不下餘並克復軍勢
大振吳國公遣都事汪河往與通好且覘其軍勢
吳國公自將伐陳友諒於江州友諒大敗奔武昌
李明道言友諒自募徐壽輝後將士離心雖有衆
不足用會安慶陷吳國公欲伐之問劉基曰今
天象金星在前火星在後此勝氣也徐達進曰師
直為壯我直彼曲烏有不克吳國公率達過春等
各將舟師發龍灣溯流而上友諒沿江斥堠皆奔

遁至安慶友諒兵固守不戰吳國公以陸兵疑之
守兵動乃命廖永忠張志雄以舟師擊其水寨破
八十餘艘獲戰船二十有七遂克安慶劉基請遂
趨江州搗其巢穴遂悉軍西上長驅至小孤友諒
將傅友德丁普即迎降師次湖口遇友諒邏舟過
春擊之敵舟退走乘勝追至江 友諒出不意親
督兵拒戰吳國公令分舟師為兩翼夾攻友諒大
破之獲巨舟百餘廖永忠搗城高下造橋於船尾
名曰天橋以船乘風倒行橋傳于城士卒登堞如
平地友諒窮蹙夜半挈妻子棄城奔武昌吳國公

日紀自前紀
遂入江州遣徐達追友諒達聞友諒欲出沔陽戰
艦來拒乃屯漢陽之沘口以遏之吳國公遣將分
徇南康建昌饒新黃廣濟皆下

冬十一月吳國公遣吳宏取撫州漢守將鄧克明降
於鄧愈尋叛走

克明據撫州拒守宏急攻之克明知鄧愈駐兵臨
川遣使偽降以緩師愈知其情奉甲由間道夜襲
之黎明至城下由東西北三門入克明出不意單
騎從南門出自度不能免以分省印及所掠撫州
建昌臨江汀州四路南豐寧都富三州臨川樂安

等十八縣印詣愈降愈留克明于軍中令其弟志
明還新淦收故部曲克明請往九江謁吳國公愈
以兵送之至中途遂逃歸新淦

張士誠將李伯昇圍長興常遇春救之伯昇遁

士誠遣伯昇以衆十餘萬水陸並進直薄長興城
中兵僅七千勢不敵吳國公在江州聞報即遣陳
八王國寶等率建康宜興寧國廣興安吉兵往援
伯昇乘夜劫營諸軍皆潰耿炳文嬰城拒守遣劉
成李崇出擊並戰死伯昇遂環城結九寨為棲車
下瞰城中攻益急炳文晝夜應敵凡月餘內外不

相聞吳國公命過春救之伯昇聞過春至棄營遁
過春追擊俘斬五千餘人

十二月漢江西行省右丞相胡廷瑞遣使納款

吳國公既下江州遣使如龍興招諭廷瑞廷瑞及
平章祝宗遣宣使鄭仁傑詣江州納款且請無散
部曲吳國公初難之劉基從後蹴所坐胡床吳國
公悟乃許之報書曰鄭仁傑至言足下有效順之
誠此足下明達也又恐分散所屬他將此足下
過慮也吾起兵十年奇才英士得之四方多矣有
能審天時料事機不待交兵挺然委身來者嘗推

赤心以待隨其才任使之兵小則益之以兵位卑
則隆之以爵財之則厚之以賞安肯散其部伍使
人自疑負來歸之心哉且以陳氏諸將觀之如趙
普勝驍勇善戰以疑見戮猜忌若此竟何所成近
建康龍灣之役予所獲長張梁鉉彭指揮諸人用
之如故視吾諸將恩均義一長張破安慶水寨梁
鉉等攻江北並膺厚賞此數人者其自視無復生
理尚待之如此况如足下不勞一卒以完城來歸
者耶然得失之幾間不容髮足下當自為計

壬至正二十二年

宋韓林兒

龍鳳八年

漢陳友諒

春正月吳國公如龍興受廷瑞降以鄧愈守之

吳國公自九江如龍興胡廷瑞祝宗等獻陳氏所授丞相以下印及軍民糧儲之數率官屬迎謁于新城門外吳國公慰勞之命各仍舊職改龍興為洪都府以葉琛知府事放友諒所畜鹿于西山築臺龍沙召諭父老除陳氏苛政罷諸需存恤貧無告者民大悅建昌王溥饒州吳宏皆來見袁州歐普祥遣其子來上謁瑞州臨江吉安皆下友諒平章彭時中以龍泉降獲鄧克明因送應天洪都既定命移城去江三十步二月以鄧愈為江西行省

叅政守之胡廷瑞張民瞻廖永堅傅瓛潘友慶等從吳國公還應天留祝宗康泰將所部助愈守

二月金華苗帥蔣英殺叅政胡大海叛郎中王愷死之

英及劉震李福之降也大海喜其驍勇留麾下至是三人謀作亂晨入分省署英袖鐵椎陽請大海觀弩於八詠楼下大海出將上馬賊黨鍾矮子者跪馬前詐訴英過惡大海未及答英出椎中海海腦仆地遂殺之及其子閔住并殺王愷大海虹人善用兵每自誦曰吾武人不知書惟知三事而已

不殺人不掠婦女不焚毀廬舍以是軍行遠近爭
附及聞其死無不流涕者愷當塗人常過春守金
華時部將擾民愷執撻之過春讓愷曰民者國
之本撻一部將萬民安將軍所樂聞也過春謝之
至是賊執愷欲脅之降愷正色曰吾守土義當死
首從賊耶遂遇害時亂起倉卒典史李斌懷省印
縋城走嚴州告變李文忠遣兵馳救英等奔降士
誠文忠親至金華撫定其衆

處州苗帥李祐之殺院判耿再成叛都事孫炎知府
王道同元帥朱文綱死之

祐之及賀仁德聞蔣英已殺大海即據城叛再成
方對客飲聞變上馬收戰卒不滿二十人迎賊大
罵賊奴國家何負汝乃反賊爭刺之再成揮劍連
斷數槩墮馬遇害賊遂執炎道同文綱幽空室脅
降皆不屈賀仁德饋雁酒炎罵賊怒叱解衣炎曰
此紫綺裘主上所賜吾當服以死遂並遇害再成
五河人文綱吳國公養子也炎句容人面錢色跛
一足負經濟才死時年僅三十李文忠聞處亂即
遣將進屯縉雲吳國公尋命帥榮率兵討之

以朱文忠為浙東行省左丞

開省金華總制衢處信嚴諸全軍務張士誠乘蔣
英之亂遣其弟士信率兵圍諸全守將謝再興擊
敗之士信憤益兵十萬來攻再興告急文忠遣胡
德濟往援再興復請濟師文忠兵少無以應聞邵
榮討處兵方至文忠曰兵法先聲而後實寇勢方
盛非謀不足以制之乃揚言徐右丞邵平章將大
軍刻日進使謀者揭榜于義烏古朴嶺士信兵見
之果驚謀夜遁德濟與再興率死士夜半開門突
擊鼓譟從之士信兵亂自相蹂踐遂大破之諸全
以完

三月降將祝宗康泰叛陷洪都鄧愈走應天知府葉
琛都事萬思誠死之

初胡廷瑞以洪都降宗泰皆不欲吳國公還應天
廷瑞密以二人情告吳國公即遣使詣洪都令二
人將所部從徐達攻武昌遂反舟次女兒港還趨
城夜破新城門入愈猝聞變以數十騎出走數與
賊遇從騎死且盡愈窘連跳跨三馬輒馬踣最後
得養子馬乘之始得脫從撫州門出賊執琛思誠
並不屈死愈還應天具言狀吳國公不之罪遣使
詣漢陽命徐達還軍討宗泰

夏四月邵榮復處州

率王祐胡深等攻處州燒東北門軍士登城入李祐之自殺賀仁德走縉雲耕者縛之檻送建康伏誅處州復平以王祐守之榮還

徐達復取洪都吳國公以朱文正趙德勝同鄧愈守之

師至城下祝宗康泰分兵拒守達攻破之宗走新淦依鄧志明後為所殺函首獻泰走廣信追兵獲送應天吳國公以泰廷瑞甥特宥之五月文正及德勝愈至增峻城池嚴守備

六月元中書平章察罕帖木兒遣使報書

吳國公謂左右曰察罕書詞婉而媚欲啗我也我豈可以甘言誘哉况徒以書來而不返我使者情偽可見我一聽于天耳時寧海布衣葉允以經濟自負獻書吳國公言天下大計以北絕察罕為一綱以南取張士誠方國珍及福建兩廣為三目吳國公竒其言欲留用之力辭去未幾察罕為田豐王士誠所殺

秋七月邵榮趙繼祖伏誅

初吳國公所任將帥最著者平章榮右丞達泰政

過春榮尤宿將善戰至是驕蹇有異志吳國公閱
兵三山門外榮與參政繼祖謀伏兵門內為亂宋
國興告之吳國公召面詰其伏曰死而已吳國公
欲宥其罪過春直前曰人臣以反名若何宥之臣
義不與共生吳國公乃飲榮酒流涕而戮之

八月漢將熊天瑞破吉安

守將孫本立戰敗走永新復為天瑞所破執本立
至贛州殺之友諒使其知院饒鼎臣守吉安鼎臣
慄悍所至毒害人呼為饒大胆

冬十二月朱文正遣裨將復吉安饒鼎臣出走

元帝遣尚書張昶授吳國公官吳國公不受

昶齋龍衣御酒以榮祿大夫江西行中書省平章
政事告身浮海如江東授吳國公時察罕既死元
勢益衰吳國公不受以昶才留官之累任至參知
政事昶明習典故裁決如流甚見信任

元將中書平章擴廓帖木兒致書歸使者且餽馬

擴廓本姓王名保：察罕外甥也養為子察罕死
軍中奉擴廓為帥元就拜太尉中書平章政事知
樞密院事如察罕官總其兵擴廓圍益都克之戮
田豐王士誠東取莒州定山東地以父察罕故使

尹煥章以書幣來通好

明玉珍稱帝于重慶國號夏

自陳友諒弑徐壽輝玉珍即以兵絕瞿唐絕不與通自稱隴蜀王以元進士劉楨為參謀至是稱帝以明年為天統元年立妻彭氏為后子昇為太子做周官制以戴壽為冢宰楨為宗伯萬勝張文炳向大亨莫仁壽吳友仁鄒興等並為六卿分蜀地為八道更置府州縣官名玉珍性節儉頗好文學開進士科定賦稅額以十分取一為則蜀人便安之皆楨為之謀也

癸卯至正二十三年

宋韓林兒龍鳳九年漢陳友諒大義三年夏明玉珍天統元年吳張士誠元年

春正月吳國公遣汪河以書報元將擴廓帖木兒

河至擴廓留之不遣

二月申明軍士屯田之令

初吳國公命諸將分屯龍江諸地至是康茂才屯積克奴他將皆不及下令曰興國之本在於強兵足食自兵興以來民無寧居連年飢饉田地荒蕪若兵食盡資於民則民力重困故令爾將士屯田且耕且戰然數年以來未見功緒惟茂才得穀給

軍餉外尚餘七千石以此較彼地力均而入有多寡其故何哉人力有勤惰耳自今宜督軍士及時開墾以收地利

移浙江行省於嚴州

以張士誠屢寇嚴及諸全行省道遠不能即達也漢將張定邊破饒州理問穆燮死之即中楊憲走還應天

張士誠將呂珍破安豐殺劉福通三月吳國公自將救之

珍聞大軍至乃水陸連營戰艦蔽河沙際皆樹木

柵繚以竹垣外掘重塹悉力拒吳國公令元帥汪某先攻拔其中壘入據之會左右軍敗汪某兵望見亦出走為塹所阻呂珍急攻之兵皆殊死戰常遇春以兵橫擊其陣三戰三勝珍兵大敗俘獲士馬無算時廬州左君弼來助珍遇春又擊敗之珍與君弼皆遁走吳國公乃還應天居韓林兒于滁命徐達等移師圍廬州於是元將竹昌忻都遂乘間入安豐達遇春圍廬凡三月不能下

夏四月漢陳友諒大舉圍洪都

友諒忽疆土日威治棧船數百艘皆高數丈飾以

丹漆每船三重置走馬棚上下人語聲不相聞艣
箱皆裹以鐵載其家屬百官盡銳圍洪都朱文正
令鄧愈趙德勝及薛顯牛海龍等分城拒守已居
中節制友諒親督軍屯於撫州門兵各戴竹盾如
箕禦矢石極力攻城壞三十餘丈鄧愈以火銃擊
退其兵即豎木柵敵來爭文正督諸將死戰愈且
戰且築通夕城完於是牛海龍等戰死會友諒別
將蔣必勝及饒昂臣陷吉安執叅政劉齊知府朱
叔華陷臨江執同知趙天麟俱不屈送洪都友
諒殺三人徇城下因轉攻新城門薛顯將銳卒開

門爰戰斬其平章劉進昭擒副樞趙祥敵兵乃退
城中守益固友諒忿增修攻具攻水閘欲破柵入
文正使壯士鍛鐵戰鐵鉤穿柵刺之敵來奪手皆
灼爛不得進友諒盡攻擊之術城中禦備隨方應
之友諒計窮又移攻宮步士步二門趙德勝中流
矢死內外阻絕音問不通文正遣千戶張子明乘
小漁舟夜從水閘潛出越石頭口半月得達應天
告急吳國公曰汝歸語文正但堅守一月吾自當
取之子明還至湖口為友諒兵所獲友諒謂曰若
能誘城降非但不死且富貴子明偽許之至城下

大呼曰大軍即至但固守友諒怒殺之攻城益急
諸全守將謝再興殺知州樂鳳叛走降於張士誠
五月吳國公築禮賢館

聘召諸名儒先後皆集應天與論經史及咨以時
事命有司即所居之西築館處之陶安夏煜劉基
章溢宋濂蘇伯衡等皆在館中朱文忠守金華復
薦王禕許元王天錫至吳國公並收用

漢別將破無為州知州董曾死之
秋七月吳國公自將救洪都及陳友諒大戰於鄱陽
湖友諒敗死子理奔武昌復稱帝

初吳國公議用師所向諸將以吳地饒易取漢強
宜後劉基曰士誠自守虜也友諒據工流且名號
不正乃心無日忘我宜先伐之友諒滅士誠囊中
物耳吳國公以為然及洪都急召徐達常遇春於
廬州令還師命李善長居守吳國公遂以癸酉大
會達遇春廖永忠俞通海諸將禡于龍江率舟師
二十萬向湖口先遣一軍扼涇江一軍屯南湖嘴
遇友諒歸路復令一軍守武陽渡防奔軼友諒圍
洪都已八十有五日聞援兵至即解圍出鄱陽湖
迎戰丁亥與吳國公軍遇于康郎山友諒兵號六

十萬艘艙高者十餘丈樓艦如山聯亘數十里吳國公謂諸將曰彼巨舟首尾連接進退不利可破也乃分十一隊禦之戊子合戰達先諸將奮擊敗其前鋒殺千五百人通海焚其舟數十兩軍鏖鬪久火延及達舟友諒軍乘之達撲火更進戰益力友諒軍乃退友諒驍將張定邊直犯吳國公舟適膠淺去諸將舟遠定邊即麾軍前吳國公危甚指揮韓成曰古人殺身成仁臣不敢愛其死邊服吳國公冠袍對漢軍自投水中定邊驚喜常遇春從旁舟射中定邊定邊却通海以飛舸來援舟驟

進水湧吳國公舟得脫是日元帥宋貴陳兆先戰死暮鳴鉦收軍中約束命達還守應天己丑友諒悉巨艦出戰諸將舟小仰攻多不利吳國公親麾之丁晉即張志雄等戰死晉即首脫猶執戈直立不仆友諒軍駭為神郭興告吳國公曰此非火攻不可會日晡大風起吳國公令死士搯七舟載荻葦寔以藥迫友諒巨艦乘風縱燒之風猛火烈烟燄蔽空湖水盡赤友諒兵大亂過春諸將鼓譟乘之斬首二千餘級焚溺死者數萬友諒弟友仁號五王者焚死友諒始氣奪時吳國公所乘舟檣白

友諒欲併力來攻吳國公知之夜令諸船盡白其檣旦視莫能辨友諒益駭辛卯復戰吳國公坐胡床麾軍劉基忽躍起大呼趣更舟吳國公遽徙別舸坐已定礮未碎舊所乘舟矣通海永忠及張興祖趙庸等以六舟深入友諒軍聯巨艦圍之吳國公望六舟不見疑已陷沒有頃六舟旋繞敵艦出飄飄如游龍軍士勇氣百倍合戰益力呼聲動天地波濤起立白日為晦自辰至午友諒軍大敗棄甲仗蔽湖面於是友諒斂舟自守不敢更戰諸將請退稍休吳國公曰兩軍相持先退非計也必先

出湖乃無患時泊柴棚水路隘恐為敵乘夜令舟置一燈相隨渡淺比明盡渡泊左蠡友諒亦移軍渚磯相持三日其左右金吾二將皆降友諒勢益盛吳國公移書諭之留使者不遣獲戰士皆殺之吳國公則悉遣所俘傷者賜以藥且祭其弟姪諸將之戰死者既師出湖口命過春永忠諸將率舟師橫截之復分軍立柵于崖控湖口旬有五日友諒不敢復出移書請讓之恚不能答八月壬戌友諒軍食盡趨南湖嘴為南湖軍所扼遂突湖口吳國公邀擊之順流搏戰及涇江涇江口軍復擊之

友諒中流矢死擒其太子善兒其平章陳榮等悉
棲船來降得軍士五萬張定邊乘夜以小舟載友
諒屍及其次于理適歸武昌吳國公遣兵追之不
及定邊至武昌復立理為帝改元德壽是月吳國
公改洪都為南昌府九月還應天告廟飲至論功
行賞有差初吳國公救安豐慮安豐為士誠所并
則益強劉基建諫不聽至是謂基曰我不當有安豐
之行使友諒乘虛直擣應天則大事去矣乃頓師
南昌不亡何待漢亡天下不難定也遂命李善長
鄧愈留守應天自將諸軍討陳理

冬十月吳國公圍武昌遣將分徇湖北諸路皆下
十二月以常遇春督諸軍吳國公還應天
張士誠自稱吳王元使徵糧不與

時士誠拓土南抵紹興北有通泰高郵淮安踰徐
州達于濟寧之金溝西距汝穎濠泗東薄海二千
餘里帶甲數十萬自置官屬以弟士信及女婿潘
元紹為腹心左丞相徐義李伯昇呂珍為爪牙叅
軍黃敬夫蔡彥文葉德新主謀議元學士陳基右
丞饒介典文章又好招延賓客所贈遺輿馬居室
什器甚其諸僑寓貧無藉者爭趨之士誠為人外

遲重寡言號為有器量中寔闇弱據吳中見戶口
殷富漸奢縱怠于政事士信元紹尤好聚斂自金
玉珍寶至法書名畫充牣于家日夜以歌舞相娛
樂諸將亦偃蹇不用命每有攻戰輒稱疾高臥至
軍所不以軍務為急喪師失地還士誠概置不問
復用為將威權不立以至於亡

甲辰至正二十四年

宋韓林兒龍鳳十年
漢陳理德
壽元年
夏明玉珍天統二年
吳張士誠二年
是歲漢亡

春正月吳國公即吳王位建百官

李善長等率羣臣勸進吳國公不許羣臣固請乃

即王位建百司官屬 吳王坐白虎殿與孔克仁

論天下形勢因曰自元運既廢中原豪傑互相仇
敵必將有變吾欲以兩淮江南諸郡歸附之民各
於近城耕種訓練兵農兼資以圖中原何如克仁
對曰積糧訓兵待時而動此長策也

吳王置中書省以李善長為右相國徐達為左相國
常遇春俞通海為平章政事

諭之曰立國之初當先正紀綱元氏昏亂法度不
行威武下移馴致于亂今宜鑒之

吳王立子標為世子

妃馬氏生子五長即世子次榘桐棣楠

二月吳王視師武昌陳理降赦之漢沔荆岳潭州皆
下三月還應天

常遇春督諸軍圍武昌急張定邊遣卒夜縋城走
岳州告其丞相張必先入援吳王親視師必先至
去城二十里軍於洪山必先故驍將漢軍倚為重
吳王令過春率精銳五千擊擒之以徇城下必先
兄呼定邊曰事敗矣善自固定邊氣結不能語城
東南有高冠山可俯瞰城中吳王問諸將孰能奪
傅友德請行遂率數百人一鼓奪之城益阻喪

欲降者衆吳王乃遣漢故臣羅復仁入城招理許
以不死理嚙壁肉袒率定邊等開城門出降入軍
門股粟不敢仰視吳王見理幼弱掖之起握其手
曰吾不汝罪也命宦者入其宮慰諭友諒父母凡
府庫財物恣理自取吳王師圍武昌凡六閱月而
下士卒無敢入城市井宴然城中人久飢困命給
米賑之召其父老遍加撫慰武昌民大悅於是諸
郡縣相繼降附友諒兄友才故與左丞王忠信守
潭州聞武昌急忠信來援戰敗遂降吳王授叅政
仍命守潭友才亦降吳王置湖廣行中書省於武

昌以楊璟為叅政守之三月吳王還應天封陳理為歸德侯以平江漢布告中外江西行省以友諒鏤金床進吳王曰此與孟昶七寶溺器何異陳氏窮奢極靡宜其亡也即令毀之

吳王置起居注給事中定大都督府等官制

省臣以所定官制班次圖進吳王覽畢因諭及選諫議之官曰輔弼將帥侍從臺察皆朝廷要職至于絕愆糾繆拾遺補過諫諍之臣尤難其人必公爾忘家忠爾忘身方可任之不然患得患失之後將何所賴也

吳王置十七衛親軍指揮使司

先是所得江左州郡各置翼統軍元帥府至是悉罷之置武德龍驤豹韜飛熊威武廣武興武英武鷹揚驍騎神武雄武鳳翔天策振武宣武羽林十七衛

吳王求賢才

勅中書省臣曰今王宇日廣文武並用卓犖竒偉之才世豈無之或隱于山林或藏于士伍非在上引拔之則無以自見自今有能上書陳言敷陳治道武略出眾者具以名聞若其人雖不能文章而

識見可取者許詣闕而陳其事吾將試之爾中書
其下所司宣布此意

夏四月吳王祀死事丁普郎等於康郎山趙德勝等
於南昌

康郎山忠臣廟祀丁普郎張志雄韓成宋貴陳兆
先余昶冒文貴王勝李信陳弼劉義徐公輔李志
高王咬住姜潤石明王德朱鼎王清常德勝王鳳
顯丁字王仁汪澤王理陳冲裴軫王喜仙袁華史
德勝常惟德曹信遠德鄭興羅世榮三十五人南
昌忠臣廟祀趙德勝李繼先劉齊許圭趙國昭朱
潛牛海龍張子明張德徐明夏茂葉思誠葉琛趙
天麟十四人

吳王遣徐達常遇春取廬州

元將左君弼聞達等至遁走安豐命其將張煥殷
從導等城守達督兵圍之閱三月城中飢困不能
戰煥潛送款請達攻東門已為內應達軍急攻之
城中諸軍悉救東門煥遂斷釣橋開西門出降達
入城執吳副使及君弼母妻子送應天守以指揮
戴德達等還吳王改廬州為府置江淮行省命俞
通海攝省事鎮之兵革之餘民多竄匿通海日加

撫輯為政有惠愛由是復業者衆

吳王減商稅

先設官店征商吳王以稅太重議減之諭中書省
凡商稅三十稅一過取者以違律論改在京官店
為宣課司府州縣官店為通課司其冬又裁革通
課司十有七所商民稱便

六月元湖廣安定宣撫司向思明來附

溪洞各地仍置宣撫司統軍元帥長官司等土官
自是來附者日多

秋七月吳王遣常遇春率師徇江西八月下吉安攻

贛州不克圍之

遇春會鄧愈討平新淦之何坑麻嶺牛陂諸寨執
故漢知州鄧志明送應天與其兄克明皆伏誅遇
春遂進次吉安遣人語守將饒鼎臣曰吾今往取
贛可出城一言鼎臣怖不敢出遣幼子出見遇春
飲之酒贈衣服遣歸曰語而父意欲何為可善自
為計鼎臣即夜棄城走安福遇春復吉安遂引兵
趨贛攻之熊天瑞固守不下吳王遣平章彭時中
以兵助遇春又命汪廣洋參遇春軍事諭廣洋曰
汝語遇春天瑞猶籠禽阱獸豈能逃逸但恐城破

之日殺傷過多要當以保全生民為心耳天瑞拒
守益堅遇春乃浚濠立柵以困之

吳王遣徐達帥師徇湖湘諸路九月下江陵夷陵潭
歸皆降

達及楊璟率兵取江陵次沙市故友諒平章姜瑀
以城降且曰當死者瑀耳百姓無辜達善其言下
令安輯居民列郡聞望風欵附遣傅友德將兵取
夷陵守將楊以德降達自至潭州湘鄉土酋易華
率所部降歸州守將楊興亦降

方國珍請歲輸貢

温州人周宗道以平陽來降國珍次子明善守溫
以兵爭叅軍胡深擊敗之遂下瑞安進兵温州明
善恐乃與國珍謀請歲輸銀三萬兩以給軍資俟
杭州下即納土入朝吳王詔深班師

冬十月吳王遙授廖永安為平章政事封楚國公
永安久被張士誠拘於蘓州守義不屈故有是命
張士誠兵圍長興吳王遣湯和赴援擊敗之

士誠弟士信攻長興耿炳文擊敗之擒其元帥宋
興祖士信忿益兵圍長興和自常州率師援士信
以兵拒戰自巳至申闕不解殺傷相當炳文自城

日新自前
中出兵內外夾擊士信兵大敗和還常州

元慈利土官譚垕來附

十二月徐達取辰州衡州

達兵至辰故漢左丞周文貴據白雲關以拒達遣
張彬擊敗之文貴遁走達遣傅友德攻衡州元左
丞鄧勝祖退保永州辰衡二州並下

